

十八、碑志

（一）山谷先生墓志铭

先生讳庭坚，字鲁直。生宋仕宗庆历五年六月十二日辰时，登治平四年进士，累官翰林院编修，赠龙图阁学士，谥文节。当时缙绅先生吕居仁等推为江西诗祖。舒州石牛洞有山谷寺，公遊而乐之，自号山谷道人。奉旨编修神宗实录，被论谪涪州别驾，又号涪翁。子相，字小德，亦有诗名。先生于崇宁四年九月三十日歿于宜州贬所。大观三年十一月门人苏伯固蒋伟護其灵柩归葬双井祖塋之西。

铭曰：于戏修之水兮色悠悠，泉甍沸兮在中流，公往来兮井井，云在溪兮月在岑，公井井兮往来，鳞翩烂兮凤颀腮，修有鲜兮匪鱣，匪鲔饮有茗兮匪浆，匪醴修水盘兮淪石鼎，香之清兮味之永，公欲云

去兮何傍徨，乖白云兮达帝傍，达帝傍兮何为曾，孙之思兮修之水。
长恸哉情不忘，将斯文镂太史之祠堂。

翰林院学士圭斋欧阳元拜撰

(二) 兰溪介休二夫人墓志铭

豫章黄庭坚之初室曰兰溪县君孙氏，故龙图阁直学士高郵孙公觉莘老之女。年十八归黄氏，能执妇道，其居室相保惠教诲，有迁善改过之美，家人短长不入庭坚之耳。方是时，庭坚为叶县尉，贫甚。兰溪安之，未尝求索于外家，不幸年二十而卒，殯于叶县者二十二年。继室曰介休县君谢氏，故朝散大夫南阳谢公景初师厚之女，年二十归黄氏，于礼义，事先夫人爱敬不倦，侍疾尝药不改衣，至于复常修禅学定而不废女工，能为诗而叔姝不知也。言有宫廷行，有坊表，不激不汙长少咸安怀之。年二十六而卒，生一女曰睦，才四岁过。时而先夫人哭之，哀殯于大名者十一年，元祐六年，先夫人捐馆。乃克归二夫人之骨于双井，八年二月从先夫人葬焉，同宫而异楸。初，庭坚年

十七从舅氏李公择学于淮南，始识孙公，得闻言行之要，启迪劝奖，使知向道之方者，孙公为多。孙公怜其少立，故以兰溪归之。及庭坚失兰溪数年，谢公方为介休择对，见庭坚之诗曰：吾得婿如是足矣。庭坚往求之，然庭坚之诗卒从谢君得句法。

文节公黄氏二室墓志〔案〕此文末段云：

呜呼！如兰溪之女美，介休之妇德，皆室家之则也。常欲以楚辞哭之，而哀不能成文。二夫人平牛常恨无男。二夫人歿后庭坚始得男，曰相。他日当使相乞文于予友而刻之，隧以哀其志。

（三）伯祥公墓志铭

尊先祖黄伯祥公乃宋徽宗之名臣黄庭坚之十六世孙。

明朝建文帝元年己卯岁正月初戌时生，系益秀公之长子，名仲瑞，字伯祥，配邹氏为妻。歿明成化七年辛卯三月十五日，葬什成塘，艮山坤向，享寿七旬晋一。先祖后裔子三：惟达、惟乐、惟雋。

呜呼！先祖族本殷实，数百年来，奉道固本，博爱仁慈，厚道处世，恤杖朝国。从文从武，从官从商，以仁慈布施于天下，得以皇恩诰荡，上赐『黄十万』之名流芳于后世。

自明朝建文帝始，繁衍生息，六百余年来，共万余众者，子孙遍及南京、云南、四川、湖北荆州、华容等地，可谓胸吞衡岳、气盖巴丘。时至今日，先祖之名已命名为政府之称谓，伯祥镇已为巴陵之美

誉也。她似一颗明珠，璀璨于三湘四水间，四通八达，乃诸县通衢，车驰宝马，物流如川，村村衔接，户户珠联。

先祖伯祥公之后裔，村丛别墅，户垒余钱。所建伯祥集镇之繁华，天衢纵横，商贾云集，一片歌舞升平，可谓蒙先祖之气聚我伯祥。日新月异，龙骧于前，毓秀钟灵，人才川汇，铸就后辈人才壮丽楚天乎！此皆为先祖之荫德所庇佑于后辈乎！

此则，成后嗣所共有之心绪，承启光宗耀祖之宗旨，立定于公元二〇一四年甲午岁重新修缮先祖坟茔，刊碑之传以记之。立德之言，世代流芳。

同里中学教师刘美金拜撰

（四）惟达公葬志

惟达伯祥公长子也，字仕通，明宣德四年己酉四月十七日亥时生，以伯祥公命迁井头屋，而子孙遂家焉，歿成化十九年癸卯六月二十日未时，葬门前之黄思墩申山寅向，配孺人蒋，圻亦祔焉，戌山辰向，惟年代久远，圹于古制墳碑未立。虽其山仅数十丈许，莫能定其指。又后世子孙入葬是山者累累也，且孤貉之穴徧冢疏犁，堆塹狼籍，坟无壤树，稀拜扫缺。呜呼！为人后者乃于是乎。吾是以泫然悲也。昔梅朗中有云：苟千百世而知吾为其祖宗，则吾固千百世而有其子孙矣。其状祖宗之相须于子孙何如也，如子孙者应如何保守维持以慰其一念，岂可求之不得而任之也哉。近世吾巴陵南屏吴氏求其始祖之墓不得，至决之卜筮，孝子仁人之用心固应如是也。兹因谱载山

向，择地竖碑以垂久远，是尚愈于衣冠而葬之义。凡我惟达子孙应岁时拜扫，培补永著为法。自公歿之岁至是四百零三年，人口至是男妇衍相一百八十八口，而迁居南京者不与焉。

民国二十四年乙亥冬

十四世裔孙澄清畅安氏谨志

(五) 黄珀珊先生暨刘孺人墓志铭

珀珊先生予弟子萃元考也。既歿之五年，萃元以予前清逸民，由资兴官廨走书徵铭。予以两代世交义不可辞，谨按来状及素所稔知者铭之。先生讳发琅，字琼瑶，号珀珊，诰赠登仕郎，哲人公之子，兄弟四，先生其三也。长兄子垣亦予弟子，逊清监生。先生幼读书，壮即置身畎亩，服田力穡，佐赠公兴起其家。丙申岁兄弟析居，各程其范。而先生即以赠公之治家者治之，勤以济事俭以持身，待人接物一以诚意将之。性温和，横暴突来立能自克，面貌春秋人见者敬而惮之。教子耕与读埶，三子遂各有成。晚岁精神尚健，然雅不欲以家事累。会计付长子，田事付三子，先生则悠游岁月把酒怡情，第蓄意创造以基地为家人析有之，地难敞未就卒，卒后萃银等另度土村西，先生志也，原配豫人杨葬茶盘坵，继配孺人李葬居室后山，三配孺人

刘年二十七来归，温恭淑静内外宜之，助理家政勅始愆终勤俭一致，于贫寒孤苦并能度义之，平而时恤之，岁庚午孺人卒，享年五十九，后十余日先生卒，春秋同之，时十一月二十八及十二月十一日也。革命军兴，人尽逃窜，枪声隆隆时来耳际，而先生孺人得保首领以歿抑何辛也。子三人，长萃银，次萃元，次萃光。银、光业农，元毕业湖南明德中学，又毕业自治专门学校，分发华容资兴等县统计科员。女四，长季适方，次适刘，三适周，孙三人。翰国藩葬柳树铺傅家墩子山午向。

铭曰：翳维先生，诂田舍翁，鑿井而饮，以飨尔躬，耕田而食，以蕃尔童，义方是训，次子显通，翳维先生，缘自苍穹，不然胡大劫之来临，遂乾随坤遁乎！鸿蒙抑偕老有约，步古之金母木公。

民国二十四年乙亥冬

教愚弟清恩贡生袁人纪希之氏谨撰

（六）菊圃公墓志铭

公讳发道，字在明，号菊圃，黄孝廉五世孙也。曾祖汝坚，邃于学祖长立以工书名，父静斋，生公兄弟二。公性友爱，与伯兄居六十余年未尝有忤词，同居十余家，习于雍睦公之化也。自幼勤学，长从刘孝廉墨农许岚峰方吉轩诸先生游，学问颇有门径，阨于有司，遂援例就从九职，不复与试。而读书不少，倦馆于家塾，手编史鉴四卷，录愚庄讲义十二卷，愚庄文集二卷，盖纂所好以为子孙法也。季君竹秋学有成就，尝自述其渊源如此。咸丰壬子土匪蜂起，公家煨烬，时江忠烈公军新牆，公同先祖鹤林公至军议剿。忠烈给公文，至令抚轅领军械与先祖团练剿匪，争以母老不果行。此事公尝为萃言之，且以国家多难未克，一抒忠愤为憾。家居鲜酬，应里有争则力排之。或釀

金寢事，人以是多德公事后不之及也。生平寡嗜好，独喜酒，尝自擬刘伶云，光绪戊戌七月二十七日寅时忽命大盞四酌而逝。人以其来也或有自，其去也或有因，其然乎？其不然乎？

赞曰：我公能饮而不流为，任达独化乡以则友，学不求达于当时，将厚其蓄积以待发攄於后。

世愚晚刘光萃淑元氏谨撰

（七）郎山公墓志铭

余读太史公货殖传，辄薄猗顿卓氏辈挟其术以自私利，而转恨业斯术者无能反其道以公之世。黄公郎山余同里也。故善居积，然于子孙衣食之谋若不甚措意者。家虽充裕，歆然有卫子荆风。十五世祖伏太公由潼溪徙居同里，遂家焉。因衍丁众，子孙因以名族，近邻即因以名地，君即其裔孙也。生齿既繁则贫富不一，君奋然倡议取山林之利而生意之，遂成钜貲而用以济族间之最贫者，至今父老子弟利益均霑，皆君之力也。黄姓旧例合祀于平江岑川之九峰，君念地远途艰不能必子孙之祭，不欲疏也，复经营余貲建祠。宅左灵光一座巍然道周衣冠踰济骏奔使之君，盖能分其治家之余技而施之收族敬宗者也。然则君之术不必若猗顿卓氏之精，而其心之公用之广，故视诸货殖家之

一毛不拔者胜一筹矣。公讳衍明，字全耀，号郎山，生清道光十二年二月十九日亥时，歿光绪二十八年六月二十四日寅时，寿七旬晋一。葬祠右船形下莲花形寅申兼甲庚，配氏姚，子四人：长庆松；次庆柏，早世；次庆森，出为兄星佑公嗣；次庆柄。孙男四人，曾孙男九人，玄孙一人。

赞曰：于铄黄宗，有颺其绵，聚族于斯，于万斯年，公家之利，爰及我私，奕奕寝庙，君子作之，伊谁之力。金曰：此公承先启后，利赖无窮。峨峨冈阡，穆如清风。

同里举人刘光萃拜撰

（八）隐齐公墓志铭

黄公讳庆榜，字有名，隐齐其别号也。性诚笃，浑朴无华，其幹才韞而不露。生甫三龄失恃，事继母不异所生，佐父理家井井有法，勤而不懈，俭而中理。铢积寸累家以小康，继母年九十五公，侍奉盘匱必亲，数十年如一日也。公父性迂，家中细務烦言聒耳，公悉聪之，无少忤事。或不当，公必委曲以补救之，而不至激其怒。大伯父贫而乏嗣，劝三叔以次子承祧，而自出产业资之。母家外祖与舅俱逝，遗弱子二人，叩其家，仅有钱数贯，以二表弟齿穉，乃代为掌管，权其子母及表弟成立，已买田数石矣。母家之后裔得以竖立家计之得以裁成者，公之力也。其幹旋骨肉於亲戚间类如此者甚多。公处世以和平相接，虽暴戾之人一以宽容处之，使之自化。平生面不见怒

色，口不出恶声，其器宇蔼然也。子三人以耕读为务，长子剑农天资敏捷，学亦渊邃；叔季皆勤俭慤实，有父风焉。诸孙岐嶷俊美，皆具可造之资。公生于道光二十一年辛丑正月十五丑时，歿于光绪二十八年壬寅二月十八卯时，春秋六十有二，葬江沙溪屋场坪田内庚甲兼酉卯向。

铭曰：天地正气，浑浩无垠。著之于人，道气乃形。还其浑浩，乃得其真。高风千古，仰此贞珉。

古罗邑庠生李襄治拜撰

（九）许孺人墓志铭

孺人氏许南峰公之五女，黄公隐斋德配也。许家世业儒，孺人夙嫻，内则事父母以孝闻。适黄后，隐斋公生母姚去世，事继母李一如生母，佐夫子匡救弥缝，兴起其家而缩衣嗇食，半米寸薪必珍必戒，勤劳细务箕拘无尘、井汲无濡、垢秽澣濯绽裂补缀，不以何任他人也。居心慈惠，惻隐常时其人之有无而赍恤之，绝不以家贫少吝，负债者不偿置弗与较。隐斋公生时尝捐有社谷，歿后挑擔之户逋欠甚夥，清理实难，董其事者议分之各自生理，长子剑农领归，孺人曰：捐之为言舍也，既捐何以收。为命归房族人掌管，其不昧於大义皆如此。颖后，母家中微，经管丧葬不遗余力，且为其嗣属代谋婚配，诸舅老幼助衣食。长子剑农，虽名坊躋蹬而学问文章卓然自立；次子金

三，子甲，勤其力以致农桑，猪鸡肥硕蔬果怒生。孙十四人，曾孙十三人，亦未有敢放其亡等之欲者。一门之内雍睦无间，孺人之教飭何如也。生清道光二十年乙巳四月二十日午时，歿光绪二十二年丙午二月十九日辰时，春秋六十晋一。剑农以予老友悉其家世，嘱为铭之。

铭曰：许氏有姒，嫔于黄门，黄门有庆，得姒以兴，其兴维何，以俭以勤，俭以济事，俭以持身，岂独俭勤，德惠及人，宜其孙子，郁郁菁菁。

世教晚清恩贡生袁人纪希之氏拜撰

（十）黄平初墓志

平初余伯姊之行七子也。幼即循谨寡言笑，尝从余子受旬读。每观其勤学好问，窃念姊兄有才君，素重诗书，是其足以慰之者。岁庚午冬赤氛起，乡里多逃散，独投邻村宦苏省扬州者，得入该州遗族学校肄业。越一年，又以不靖回。以故癸亥岁得毕邑南桂林高级学校，业时年十有八矣。名家多欲以女妻之者，而皆以恐荒学龄辞。尝曰：学龄不可缓也。以是甫毕业即投省垣文艺中学校考，得取高班。适岁大旱，转本邑联立中学插班，毕业有期矣。以病归卒于家，远近知者皆惋惜之。原其病起，试验期间各科成绩皆列优等，惟英文未试，临卒犹云与英国人谈话云。平日假归手不释卷、口不停诵，其专心一至如此也。乃竟不遂其志，谓非其不幸也耶？乡里咸曰：有如此好学之

子弟，有如此送读之父兄，今若此乃吾乡之不幸尔。呜呼！其果然乎？否乎？噫！

民国二十四年乙亥长至前八日舅氏傅介生识

(十一) 王考府君道周大人墓志

夫墓之有志何也？盖志其德志其事业以诏后人，使有所瞻仰。志其生年死月葬地，使有所凭守。然后人虽去而子孙犹若亲炙之者，其意深且远也。我王考道周大人自幼失怙，幸曾王母青霜自守，柏节长操，王考得以成立。而王考天性幼成，既念祖宗创业艰难，复怜父母遭家不造，酷嗜诗书以光大门闾。自任乡党纠纷，公平月旦，是是非非亦从未有吐刚茹柔之举。子六人，孙男二十有二人，合家庆衍，非积累深厚能若是耶，嗟嗟君子创业垂统为有继也。我后之人必宪章其法度，继述其志意表而志之，以资戒飭而敢少有陨越乎哉。王考讳宣字道周，以字行，生康熙壬戌，歿乾隆庚午，王妣罗氏，生康熙丙辰，歿乾隆丙寅，合葬郝家园乙山辛向。

孙庆翼谨志

(十二) 维宇公与子翊明公孙伯麟公天玉公合葬志

公讳尚纪、秉纪，字维宇，生二子，早世託孤于兄。兄以孤有治才，原属山东兖州府军籍，官湖南靖州。右堂讳朝辅、希辅，字翊明，生二子，长讳文瑞、金瑞，字伯麟，次讳文琯、金琯，字天玉，临终丁宁，以言男即不能长依膝下，百世之后子若孙同居一室可也。斯言可谓笃亲亲之仁于无既矣。

嘉庆二十四年冬月

五代曾孙宗杏谨撰

(十三) 黄公窆阶先生德配钟孺人墓志铭

予读曾鞏致谢欧阳公所撰先大父碑志铭。《书》云：铭之作，当观其人非畜道德而能文章者，则书之非公与。是传之难为此，遇之难又如此。今双石梦醒予弟子也，为先父请铭于予。予愧辞之，不工德不之畜何能为乎。及观所撰行状，本乎理而切于实，非诬亲者，深恐世之幽抑慷慨之士泯灭而无传，故勉志之。君讳湘，字枝桂，号窆阶，姓黄氏，前清例授太学生。自幼负异聪颖过人，识者咸以白眉目之。父宝善公积学未售，先命君仲兄醉仙负笈从师，学垂成不禄，继命君出就外付，以家累辍读业商，伏外里閭非君志也。后奉父命术歧黄，名大噪。悬壶城市心存济世，遇及贫剧病尤加意诊视，不取一黍。兼嗜诗书喜宾客，善居室，屋宇田园增其式廓。兄弟五，序居

季，笃于友爱，不以财自封，执亲之丧哀毁如礼，抚孤侄如已出，以养以教俾至成人，有授室而后异居者。姊适丁，贫极，中年寡居，岁给谷拾石，殁为甃墓立碑。兄之无嗣者后之，邻族之匮乏者酌与周恤之。或以缓忽来者，罔不应债不偿，亦不问。丙午岁歉，鳩鹄遍乡团。君竭所有，日三番赈之，今犹口碑载道。当君周甲之岁，登台祝嘏几空其间。刘公次贞曾寿以汤液长生，何事丹岩传不二洞天，小隐此间，黄石竟成双之句者。德配钟孺人，渭洞太学生树俊公次女，年十九归君，性婉惬得翁姑意，自奉俭而丰于宾客之酒食、亲戚之馈遗，终年操作不以盛暑严寒易其度，子妇则之，亦不敢放其亡等之欲，盖以身教而非言教也。君大兴家业，孺人与有力焉。君享寿六十又四，卒葬官冲虎形中嘴，孺人祔焉。子二，甲深、甲梁。梁毕业县中校，曾充岳阳镇守使署諮议浏平清乡司令部上尉副官，八军三师师部少校参谋。女二，孙五，孙女三。

铭曰：计然端木，皆习为商，歧伯阿衡，于医亦良，君隐城市，复善青囊，以古拟今，实擅兼长，况敦气谊，至性觥觥，传之石碣，道左生光，厥有贤助，与子偕藏，贞珉不朽，永奠幽房。

民国二十四年乙亥孟秋月念四日

郡庠生姻愚弟张纬才晦敬撰